

Wakili Aliyevikwa Asili Yetu

Watoto wangu wadogo, nawaandikia haya ili kwamba msitende dhambi. Na kama mtu akitenda dhambi tunaye Mwombezi kwa Baba, Yesu Kristo mwenye haki—1 Yohana 2:1.

Ahadi na ruzuku za Mungu kwa niaba yetu hazina kikomo. Kiti cha enzi cha neema kinakaliwa na Yule ambaye anaruhusu tumwite Baba.... Ameweka madhabahuni Pake Wakili aliyevikwa asili yetu. Kama Mwombezi wetu, kazi ya Kristo ni kututambulisha kwa Mungu kuwa wana na binti Zake. Anawaomba wale wanaompokea. Kwa damu Yake mwenyewe amelipa fidia yao. Kwa stahiki ya wema Wake anawapa uwezo wa kuwa washiriki wa familia ya kifalme, watoto wa Mfalme wa mbinguni. Naye Baba anaonesha upendo Wake usio na ukomo kwa Kristo kwa kupokea na kuwakaribisha rafiki za Yesu kama rafiki Zake. Ameridhishwa na dhabihu iliyotolewa. Anatukuzwa na kufanyika mwili, maisha, kifo na ufufuo na upatanisho wa Mwanawe.

Katika jina la Yesu maombi yetu yanapanda kwa Baba. Anaomba kwa niaba yetu naye Baba huziweka wazi hazina zote za neema Yake kwa ajili yetu kujitwalia, kwa ajili yetu kuzifurahia na kuwapatia wengine....

Yesu ni kiunganishi kati ya Mungu na mwanadamu.... Anaweka stahili yote ya haki Yake upande wa mwombaji. Anasihi kwa ajili ya mwanadamu na mwanadamu, akiwa anahitaji msaada wa Mungu, huomba kwa ajili yake mwenyewe katika uwepo wa Mungu, akitumia mvuto wa Yule aliyetoa uhai Wake kwa ajili ya uhai wa walimwengu. Pale tunapothibitisha mbele za Mungu shukrani zetu kwa ustahili wa Kristo, harufu nzuri hutolewa kwa maombi yetu. Tunapomkaribia Mungu kwa njia ya stahili ya unyofu wa Mkombozi, Kristo Yesu anatuweka karibu na Yeye zaidi, akituzingira kwa mkono Wake wa kibinadamu, huku kwa mkono Wake wa Uungu anashikilia kiti cha enzi cha Milele. Anaweka wema Wake, kuwa uvumba wenye harufu nzuri, katika chetezo mikononi mwetu, ili kutuhamasisha kuomba....

Naam, Kristo amekua njia ya maombi kati ya mwanadamu na Mungu. Lakini amekuwa pia njia ya baraka kati ya Mungu na mwanadamu.